

Script of Morning Gojri News Bulletin 27 December 2024 at 1015Hrs

مارننگ گو جری نیوز بلیٹن مورخہ 27 دسمبر 2024

یوہ آکا شوانی جموں ہے عبد المجید تیں خبر سُنو۔

Condolence Message

سابق وزیر اعظم ڈاکٹر منموہن سنگھ غی 26 دسمبر 2024 نانہہ دہلی غا ایمز مانہہ موت ہو گئی ہے۔ وے 92 بہراں غاتھا۔ وے پچھلا کئی مہیناں تیں کسری تھا تے نازک حالت مانہہ دہلی غا ایمز مانہہ داخل کیا جان تیں بعد بیتی رات 9 بجے 51 منٹ ور ڈاکٹراں نے اُن غی موت غو اعلان کیو۔ بھارت غی 1991 غی معاشی اصلاحات غا معمار ڈاکٹر منموہن سنگھ نے 2004 تیں 2014 توڑی وزیر اعظم غے طور ور خدمات انجام دتیں۔ صدر جمہوریہ درویدی مُرمو، نائب صدر جگدیپ دھنکڑ، وزیر اعظم نریندر مو دی، کانگریس صدر ملک ارجن کھرگے تے دوجا لیڈراں نے اُن غی موت ور سوگ غو اظہار کیو ہے۔ ڈاکٹر منموہن سنگھ نانہہ اُن غی دانش وارانہ صلاحیتاں تے بھارت غی اقتصادی تبدیلی مانہہ اہم کردار واسطے یاد کیو جائے۔ لیفٹنٹ گورنر منوج سنہا تے وزیر اعلیٰ عمر عبداللہ نے سابق وزیر اعظم غی موت ور دکھ غو اظہار کرتاں واں اُن نانہہ اک ممتاز رہنما غے طور ور خراج تحسین پیش کیو۔ سرکار نے 7 دیناں غا سرکاری سوگ غو اعلان کیو ہے تے اس دوران قومی جھنڈا ادھا جھکیا رہیں گا۔

Risheek Award

جموں کشمیر واسطے اک فخر غی گل ہے جے سانہہ غا ریشیک کمار نانہہ صدر جمہوریہ درویدی مُرمو نے سائبر سکیورٹی مانہہ اُن غا اہم کم واسطے پر دھان منتری راشٹریہ بال پُر سکار نال نوازیو ہے۔ وزیر اعظم نے وی اس موقعہ ور ریشیک نال گل بات کی۔ ریشیک غی تعریف کرتاں واں لیفٹنٹ گورنر منوج سنہا نے کہیو ہے جے اِس غی ذہانت تے اختراعی جذبہ نوجواناں غا ذہناں نانہہ متاثر کرے گو، مرکزی وزیر ڈاکٹر جتندر سنگھ نے ریشیک غی سراہنا کرتاں واں کہیو ہے سرکاری نوکری غا رُجحان نانہہ توڑن تے جدید ٹیکنالوجی غے ذریعے اسٹارٹ اپ کاروبار نانہہ اپنان آلے پاسے یوہ اک قدم ہے۔

CM Bagh-e-Bahu

جموں غی سیاحت تے ثقافتی شناخت غا فروغ واسطے اک قدم مانہہ وزیر اعلیٰ عمر عبداللہ نے باغ بابو مانہہ ”ایمفی تھیٹر اوپن ائر“ تے لائٹ اور ساؤنڈ شو غو افتتاح کیو۔ اُنہاں نے کہیو جے مُلک غا سیاحتی نقشہ ور جموں خطہ نانہہ لیاں غا سرکار غا نظریہ غی یاہ شروعات ہے۔ وزیر اعظم نے دسیو جے شری ماتا ویشنو دیوی غی یا ترا واسطے سالانہ 1 کروڑ یا تریں آویں تے اُن وچوں 15 فیصد نانہہ جموں غا پُرکشش مقامات در راغب کرن غی تجویز رکھاں، جس نال سالانہ 15 لکھ سیلانی اِت آویں گا۔ وزیر اعلیٰ نے باغ بابو نانہہ ثقافتی مرکز مانہہ تبدیل کرن غی سراہنا کی، جس مانہہ نوی سہولت جن مانہہ فوارہ، ایکویریم تے اک ایمفی تھیٹر شامل ہے۔

Dar PMAY G

زرعی پیداوار تے دیہی ترقی غا وزیر جاوید احمد ڈار نے پر دھان منتری آواس یو جنا گرامین غی مُلک پھر غا لکھاں لوکاں واسطے اک اُمید غے طور ور سراہنا کی۔ جموں غا

پنچایت بھون مانہ پی ایم اے وائی جی ور اک روزہ ورکشاپ مانہ خطاب کرتاں واں وزیر نے جموں کشمیر مانہ مذکورہ اسکیم بارے دسیو جے اس نال اقتصادی طور ور کمزور طبقاں نانہ سستی رہا نش فراہم کرن تے سیا سی نمائنداں تے انتظامی افسراں بشکارہم آہنگی غے ذریعے موثر عمل درآمد نانہ یقینی بنان واسطے کردار نبھان ور زور دتو۔ پی ایم اے وائی جی غے تحت پیش رفت بارے دیہی ترقی تے پنچایتی راج محکمہ غا سیکریٹری محمد اعجاز اسد نے دسیو بے جے جموں کشمیر مانہ مذکورہ اسکیم غے تحت 3 عشاریہ 35 کھر کوٹھا منظور کیا گیا تھا جن وچوں 2 لکھ 80 ہزار کھر کوٹھا مکمل کر لیا گیا ہیں۔ سیکریٹری موصوف نے 24/2023 مانہ 67 ہزار 7 سو 80 مکانات غی ریکارڈ تکمیل واسطے محکمہ غی ستائش کی تے مزید دسیو جے دسمبر 2024 تک مزید 82 ہزار کھر کوٹھا مکمل کیا گیا۔

PM Mann Ki Baat

وزیر اعظم نریندر مو دی آئندہ 29 دسمبر نانہ اپنا ماہانہ ”من کی بات“ پروگرام مانہ ملک تے بیرون ملک رہن آلا بھارتیاں نال اپنا خیالات سانجا کریں گا۔ ماہانہ ریڈیو پروگرام غی یاہ 117 ویں قسط وے گی۔ مذکورہ پروگرام واسطے لوگ اپنی رائے ٹول فری نمبر 1800117800، نریندر مو دی ایپ یاہ مائی گوو اوپن فورم ور ٹور سکین تے یہ رائے اج 27 دسمبر توڑی قابل قبول ہو ویں گی۔ من کی بات پروگرام آکاش وانی تے دور درشن غا تمام نیٹ ورکاں، اے آئی آر نیوز ویب سائٹ تے نیوز آن اثر موبائل ایپ ور نشر کیو جائے گو۔ اسغے علاوہ اے آئی آر نیوز، ڈی ڈی نیوز، پی ایم او تے اطلاعات و تشریات وزارت غا یو ٹیوب چینلاں وروں براہ راست یوہ پروگرام نشر وے گو۔

CS Ramp Scheme

لوہکا، پہلیاں لوہکا تے درمیانہ درجہ غا کاروبار غا سیکٹر گا بابدہ غا سلسلہ مانہ چیف سیکریٹری اٹل ڈلو نے گذشتہ روز جموں کشمیر مانہ آر اے ایم پی اسکیم غا نفاذ غی حکمت عملی بارے جائزہ میٹنگ غی صدارت کی۔ اعلیٰ شراکت داراں تے موثر نگرانی غی ضرورت ور زور دیتاں واں انہاں نے 2027 تک ایم ایس ایم او غا منظرنامہ نانہ تبدیل کرن غی اسکیم غی صلاحیت آجاگر کیں۔ 77 عشاریہ 30 کروڑ روپیاں غی منظور شدہ حکمت عملی آلا سرمایہ کاری منصوبہ نال آر اے ایم پی اسکیم غو مقصد ماریکیٹ تک رسائی بدھانو تے صلاحیتاں نانہ مضبوط کرنو تے ایم ایس ایم ای واسطے مالیاتی رسائی بہتر بنانو۔

DC Poonch Mugal Road

ڈپٹی کمشنر پونچ وکاس گنڈل نے مغل سڑک ور جاری کم مانہ پیش رفت غا جائزہ واسطے اک میٹنگ غی صدارت کی۔ اہلکاراں تے مشیناں نانہ مختص کرن، سڑک غی دیکھ بھال غی حکمت عملی، تے ٹریفک غی نقل و حرکت غا وقت وغیرہ ور میٹنگ مانہ توجہ دتی گئی۔ ڈی سی موصوف نے حفاظت نانہ یقینی بنان واسطے ٹھنڈ غا حالات غی وجہ نال گڈیاں غی آؤ جائی سویرے 11 بجائیں شام 4 بجائیں محدود رکھن غی تجویز پیش کی تے سرحدی سڑک تنظیم بی آر او ور زور پایو جے سردیغا موسم غے دوران امدادی بنیا دی ڈھانچہ نانہ بہتر کیو جائے۔

Weather

محکمہ موسمیات نے جموں غا میدانی علاقوں مانہہ 27تے 28 دسمبر نانہہ ہلکی بارش
تے وادی چناب تے پیر پنجال خطہ مانہہ ہلکی برفباری غی پیشنگوئی کی ہے۔ او چیرا
علاقوں مانہہ رہن آلا لوکاں نانہہ خبردار کیو گئو ہے جے وے چوکنا رہیں کیونجے
برفباری عام زندگی مانہہ خلل پاسکے۔
